

mit zühten si zuo im sprach:
'got grüeze iuch, geselle,
und vernemet waz ich welle.
mîn vrouwe hât mich her gesant,
35 diu ist künegîn überz lant:
durch ir zuht gebôt si mir
daz ich iuch gruozte von ir,
und weste gerne mære
wer der ritter wære
40 und disiu maget wol getân.
muget ir mich daz wizzen lân,
âne schaden ir daz tuot:
mîn vrouwe vrâget wan durch guot.'
daz getwerc wolde ir niht sagen
45 unde hiez si stille dagen,
unde daz si in vermite:
si enweste war nâch si rite.
diu maget lie niht umbe daz
si enwolde rîten vûrbaz,
50 den ritter vrâgen mære
selben wer er wære.
daz getwerc werte ir den wec:
daz sach diu künegîn und Êrec
daz ez si mit der geisel sluoc
55 die ez in der hant truoc,
über houbet und über hende
ze sîner missewende,
daz si mâl dâ von gewan.
mit selher antwurt schiet si dan
60 wider zuo ir vrouwen
unde liez si schouwen
wie sêre si was geslagen.
daz begunde si vil tiure klagen
dazz ir sô nâhen was geschehen
65 daz siz muoste ane sehen.

35 vber das. 43 vrouwe *fehlt*. wan] nûr. 44 Das. 47 Sy, ez *Leitzmann nach Paul 192*. wiste. 49 wolt. 59 antwurt *Lachmann*] abentewr.

Êrec dô ahten began,
der ritter wære dehein vrum man,
daz er ez vor im vertruoc
daz sîn getwerc die maget sluoc.
70 er sprach: 'ich wil rîten dar,
daz ich iu diu mære ervar.'
diu vrouwe sprach: 'nû rîtet enwec.'
zehant huop sich Êrec,
unz er in sô nâhen kam
75 daz daz getwerc die rede vernam:
'muget ir wêniger mir gesagen,
wes hânt ir die maget geslagen?
ir hânt sêre missetân.
ir soldetz durch zuht lân.
80 iuvern herren sult ir mir nennen:
mîn vrouwe wolde in erkennen
und daz schœne magedîn.'
daz getwerc sprach: 'lâ dîn klaffen sîn.
ich ensage dir anders niht
85 wan daz dir alsam geschiht.
waz wolde si der mære
wer mîn herre wære?
ir ensît niht wîse liute,
daz ir sô vil hiute
90 gevâget von mînem herren:
ez mac iu wol gewerren.
wiltû daz ich dichs erlâze,
sô rît dîne strâze
und schabe dich der sunnen haz.'
95 Êrec der wolde ouch vûrbaz,
wan daz getwerc imz niht vertruoc:
mit der geisel ez in sluoc,

30^{va}

66 Eregk. 67 dehein *Bech*] nit ein. 72 reyrend weg, rît enwec *Leitzmann nach Haupt*. 74 unz] vnd als *A Haupt*. 75 daz ditz getzwerc. 76 *Leitzmann*] Er sprach nu muget Ir weniger man mir gesagen. 77 warumb. 79 zuht *Pfeiffer 194*] ewr zucht. 82 Magetlin. 83 las. 84 sag. 88 seyt. 91 gewern. 94 sabe, hebe *Leitzmann nach Lachmann aufgrund von habe, eines Fehlers in Haupts Abschrift von A, vgl. dazu Blosen 60f*. 96 im das gezwerc nit.